

**Siunnersuut uunga: Eqqissimatitsisarneq aamma allatigut kulturikkut eriagisassanik kulturikkut kingornussatut illersuineq pillugu.**

**Kapitali 1**

*Siunertaa, pingaartittariaqartut nassuiaatillu*

§ 1. Inatsisartut inatsisaatigut kulturikkut eriagisassat immikkoorutillit allanngorartullu illersorneqassapput Kalaallit Nunaata kulturikkut kingornussaasa ilaattut aammalu Kalaallit Nunaata kulturikkut oqaluttuarisaanerani paasinninnissamut tapertatut. Kulturikkut eriagisassat tamakku ukiut tuusintilikkaat ingerlanerini inuit suliaqartarsimanerinit uppersaataapput. Qanga maannalu pisut imminnut atassuserneqarnissaannut inuiaqatigiillu taakkunanga pilersitsisut takussaasunngortinnissaannut peqataapput.

*Imm. 2.* Kulturikkut eriagisassat nukissatut eriagisassatut, ilisimatusarnermi paasissutissanik aallerfissatut aammalu massakut inuusut siunissamilu kinguaariit misigisaqarnissaannut, imminnut paasinissaannut, atugarissaarnissaannut naparliinnannginnissaannullu qaqugumut tunngavilersuisussatut nunami maani pisussaaffeqarnitsinnut Inatsisartut inatsisaat ilaavoq.

*Imm. 3.* Inatsisartut inatsisaatigut Kalaallit Nunaata kulturikkut kingornussaasa nunarsuarmiut inuiaallu oqaluttuarisaanerannut pingaarutilimmik akuunerat qularnaarneqarpoq, kiisalu eqqissimatitassanngortitsineq allatulluunniit kulturikkut kingornussatut illersugassanngortitsineq siunertaralugu kulturikkut kingornussanik illersuineramik suliniuteqarneq aqutigalugu, Kalaallit Nunaat nunarsuarmioqatigiit kulturikkut kingornussaannik illersuinermit peqataalluni.

*Imm. 4.* Inatsisartut inatsisaatigut qularnaarneqarpoq, kulturikkut eriagisassat illersorneqarnerisa pisariaqavitsillugu, inuiaqatigiit ineriartortinneqarneranni, ataatsimoornerusumik isiginnilluni pingaartittariaqartut naapertuuttumik mianeralugit pisinnaanissaat.

*Imm. 5.* Inatsisartut inatsisaatigut qularnaarneqarpoq, kulturikkut eriagisassap aamma ilisimasat paasissutissallu kulturikkut eriagisassap imarisaasa sapinngisamik pitsaanerpaamik uppersaasorsorneqarnissaat, Naalackersuisut inuiaqatigiit ineriartortinneqarneranni, ataatsimoornerusumik isiginnilluni pingaartittariaqartut innersuullugit, tak. § 3, eqqissimatitsinissamik allatulluunniit kulturikkut kingornussatut illersuinissamik pilersaarutit tunuarterneqarnissaannik aalajangiissappata, imaluunniit eqqissimatitsinermik allatulluunniit kulturikkut kingornussatut illersuineramik pioreersumik allannguissappata atorunnaarsitsissappataluunniit.

§ 2. Kulturikkut eriagisassat inatsimmi matumani pineqartut tassaapput qanganitsat eriagisassat imaaliallaannarlugit peerneqarsinnaanngitsut, illut kiisalu sumiiffiit kulturikkut oqaluttuarisaanermit pingaarutillit.

*Imm. 2.* Qanganitsat eriagisassat imaaliallaannarlugit peerneqarsinnaanngitsut tassaapput inoqarsimaneranut ersiutit tigussaasut, qangaaniilli piusut taakkualu sumiiffimmini attuumassuteqarfii.

*Imm. 3.* Illu tassaavoq illu pineqartoq tamarmi, illup silataa, illup ilai ataasiakkaat illullu avatangiisai qaninnerit, tamarmiusumik ataavartitsinissamut illersuinissamulluunniit ilaasut.

*Imm. 4.* Sumiiffiit kulturikkut oqaluttuarisaanermit pingaarutillit tassaapput sumiiffiit kulturikkut oqaluttuarisaanermit atatillugu naleqartut.

§ 3. Naalackersuisut immikkorluinnaq pisoqartillugu, kiisalu inuiaqatigiit ineriartortinneqarneranni, ataatsimoornerusumik isiginnilluni pingaartittariaqartunik, patsisitalersukkamik innersuussillutik, tak. imm. 2, eqqissimatitassanngortitsinissamik

allatulluunniit kulturikkut kingornussatut illersugassannortitsinissamik eqqarsaat tunuartinneqassasoq aalajangiisinnaassapput imaluunniit eqqissisimatitassannortitsisimanermik allatulluunniit kulturikkut kingornussatut illersugassannortitsisimanermik pioreersumik allannguisinnaassallutik atorunnaarsitsisinnaassallutilluunniit. Naalakkersuisut aalajangiinermi kulturikkut eriagisassap kulturikkut oqaluttuarisaanermi pingaaruteqassusianik, kulturikkut eriagisassap takornariaqarnermut atatillugu periarfissariunnagaanik aamma eqqissisimatitsinnginnerup allatulluunniit kulturikkut kingornussatut illersuinnginnerup kingunerisassaanik naliliissapput, suliffeqarfiup pineqartup inuiaqatigiit ineriartortinneqarneranni, ataatsimoornerusumik isiginnilluni pingaartittariaqartuunerarneqarneranut naleqqiussillutik.

*Imm. 2.* Inuiaqatigiit ineriartortinneqarneranni, ataatsimoornerusumik isiginnilluni pingaartittariaqartutut paasineqassapput, tunngavigisat makkunannga patsiseqartinneqartut:

- 1) inuiaqatigiit nukissamik ataavartumik pilersorneqarnissasa qularnaarnissaannik kissaateqarneq,
- 2) inuiaqatigiit pinngortitaq pissutigalugu ajunaarnersuit malitsigisinnaasaannut illersornissaasa isumannaarnissaannik kissaateqarneq imaluunniit,
- 3) inuutissarsiornikkut suliffeqarfinnik pilersitsinissamik imaluunniit pioreersunik annertusaanissamik kissaateqarneq, taakku
  - a) inuiaqatigiinnut iluanaarutaasinnaasunik annertuunik pilersitsippata aamma
  - b) sumiiffimmi allami kulturikkut eriagisassanik equiffiunngitsumi annertuunik aningaasartuuteqarneroqqaarani ingerlanneqarsinnaanngippata.

*Imm. 3.* Naalakkersuisut inuiaqatigiit ineriartortinneqarneranni, ataatsimoornerusumik isiginnilluni pingaartittariaqartut innersuullugit aalajangiussippata, Naalakkersuisut aalajangiussinermiinnut atatillugu aammattaaq aalajangiiffigissavaat, kulturikkut eriagisassap aamma ilisimasat paasissutissallu taassuma imarisaasa illersorneqarsinnaasumik uppersaasersorneqarnissaat ilutigisaanik qanoq pissanersoq, tak. § 1, imm. 5. Naalakkersuisut aalajangiussinermi pingaartissavaat kulturikkut eriagisassap kulturikkut oqaluttuarisaanermi pingaaruteqassusia aamma kulturikkut eriagisassap illersorneqarsinnaasumik uppersaasernerneqarnissaanut iliuusissat pisariaqartinneqartut qanoq ittuunissaat qanorlu annertutiginnissaat. Naalakkersuisut kulturikkut eriagisassaq pillugu isumannaatsumik uppersaasersuinissaq qularnaarumallugu iliuuserisassatut aalajangiussaannut aningaasartuutit, sanaartortsitsisumit imaluunniit suliffeqarfiup, inuiaqatigiit ineriartortinneqarneranni, ataatsimoornerusumik isiginnilluni pingaartittariaqartuuneranik tunngaveqarluni pilersinneqarneranut akisussaasumit akilerneqassapput. Aalajangiinermut atasumik Naalakkersuisut aammattaaq allanik piunnaasaateqarnissamik aalajangiisinnaassapput.

## **Kapitali 2**

### *Qanganitsat eriagisassat imaaliallaannarlugit peerneqarsinnaanngitsut*

§ 4. Kapitalimi uani pineqarput nunami imartamilu qanganitsat eriagisassat imaaliallaannarlugit peerneqarsinnaanngitsut.

§ 5. Qanganitsat eriagisassat 1900-p siornaneersut tamarmik eqqissisimatitaapput, taakkununga ilanngullugit illukut, nunaqarfikut, ilerrit iliveqarfikullu. Nunaannarmi ilerrit 1900-p kingornaneersut aammattaaq eqqissisimatitaapput.

*Imm. 2.* Nunatta Katersugaasiviata Allagaateqarfiatalu, taamaattoq tak. § 8, tamanna pillugu tusarniaareernerup kingorna, tak. § 7, imm. 3, eqqissisimatitassatut aalajangiiffigissavai 1900-

miit kingornagullu sanaartukkat, iliveqarfiit atorunnaakkat, inussuit, narsaatit tamakkunanilu ujaqqanik asseqtaliussat, piunnarnissaat oqaluttuarisaanermut annertuumik pingaaruteqartut.

*Imm. 3.* Naalackersuisut Nunatta Katersugaasiviata Allagaateqarfialu inassuteqaateqarnera naapertorlugu, qanganitsat eriagisassat imaaliallaannarlugit peerneqarsinnaanngitsut eqqissisimatinneqarnissaat malittarisassaliuussinnaavaat, eqqissisimatitsinissamut piunasaqaatit ilanngullugit.

**§ 6.** Eqqissisimatitassanngortitsinerup kingunerissavaa eqqissisimatitassanngortitat innarlerneqannginnissaat, allanngortinneqannginnissaat imaluunniit tamakkiisumik ilaannakortumilluunniit nuunneqannginnissaat.

*Imm. 2.* Qanganitsanit eriagisassaniit imaaliallaannarlugit peerneqarsinnaanngitsuniit 2 meterisut ungasitsigisup iluani suugaluartunilluunniit ingerlatsisoqaqqusaanngilaq.

*Imm. 3.* Qanganitsanit eriagisassaniit imaaliallaannarlugit peerneqarsinnaanngitsuniit 2 meterimiit 20 meterisut ungasitsigisup iluani suugaluartunilluunniit ingerlatsisoqaqqusaanngilaq, nunalerinikkut ingerlatsinerit qanganitsanullu eriagisassanut orniguttut aqqusineeraliunnerat eqqaassanngikkaanni. Nunalerinikkut ingerlatanut ilaapput nunap qaavaniit 15 cm tikillugu itissusilimmut nunap qaavanik nalimmatserineq, naggorissaaneq, naasussaliineq kiisalu nunatap ivigartortitsivittut atorneqarnera. Nunalerinikkut ingerlatanut allanut, matumanittaaq ujaraajaanissamut, kiisalu paasissutissanut nivinngaaviliinissamut, eqqaavinnik allanillu inuit qanganitsanut eriagisassanut imaaliallaannarlugit peerneqarsinnaanngitsunut tikitsisinnaaneranunut iluaqutaasinnaasunik ikkussinissamut Nunatta Katersugaasivia Allagaateqarfialu akuersissuteqarsinnaavoq.

*Imm. 4.* Immikkut tunngavissaqavitsillugu imm. 1-3-mi aalajangersakkat sanioqqunneqarnissaat Nunatta Katersugaasiviata Allagaateqarfialu akuersissutigisinnaavai.

**§ 7.** Atuisut nunaminertamik tunineqarsimasut allatulluunniit nunaminertamik atuisinnaatitaasut, kommunalbestyrelsit, pisortani oqartussat sumiiffinnilu katersugaasiviit peqatigiiffiillu, nalinginnaasumik aalajangersimasumilluunniit eqqissisimatitsinissaq ataavartitsinissarluunniit siunertarlugu isumagisaqartut, qanganitsanik eriagisassanik imaaliallaannarlugit peerneqarsinnaanngitsunik eqqissisimatitassanngortitsinissaq pillugu suliassanik, kiisalu taakkuninnga allanngortitsinissamik atorunnaarsitsinissamilluunniit suliassanik saqqummiisinnaapput. Tamatuma saniatigut Nunatta Katersugaasivia Allagaateqarfialu nammineeurluni suliassanngortitsisinnaavoq.

*Imm. 2.* Nunatta Katersugaasivia Allagaateqarfialu qanganitsat eriagisassat imaaliallaannarlugit peerneqarsinnaanngitsut eqqissisimatitassanngortinnissaat aamma tamatuminnga allanngortitsinissaq imaluunniit atorunnarsitsinissaq pillugit aalajangiisuusaaq. Nunatta Katersugaasivia Allagaateqarfialu aalajangiinnermut atatillugu piunasaqaatinik aalajangersaasinnaavoq.

*Imm. 3.* Eqqissisimatitsinerup tunngasunik aalajangiisoqartinnagu imaluunniit allanngui-soqartinnagu atorunnaarsitsisoqartinnaguluunniit, inuit tamat, atuisut nunaminertamik tunineqarsimasut allatulluunniit nunaminertamik atuisinnaatitaasut, kommunimi qanganitsap eriagisassap imaaliallaannarlugu peerneqarsinnaanngitsup inissisimaffigisaani kommunalbestyrelsi, Naalackersuisut allallu pineqartumut soqutigisallit ilisimatinneqassapput tusarniaavigineqarlutillu. Tusarniaaneq qaammatinik 3-nik sivissuseqassaaq, piffissallu taassuma iluani taaneqartut oqaaseqaateqarnissamut periarfissaqartitaassallutik. Kiisalu Kulturikkut kingornussat pillugit siunnersuisoqatigiit inassuteqaateqassapput, tak. § 29, imm. 2.

*Imm. 4.* Imm. 3-mi taaneqartup nalunaaruteqarnerup pineraniit eqqissisimatitassanngortitsinissamut akornutaasinnaasumik imaluunniit ajornartorsiortitsinissamut iliuuseqartoqassanngilaq. Tamanna atuutinngilaq

aatsitassarsiornermut aamma sikumik imermillu isumalluutitut tunngasuni misissueqqaarnissamut, ujarlernissamut atuisinnaanermullu akuersissutaareersunut, kiisalu erngup nukinganiq nukissiorfiliornernut taamatullu taakkununga atasumik misissueqqaarnernut.

**§ 8.** § 7, imm. 3 malillugu tusarniaanermi tunngavissaqartumik paasinarsippat eqqissimatitassanngortitsinissamik eqqarsaateqarneq imaluunniit eqqissimatitassanngortitamik pioreersumik atuutsitsiinnarnissamik allannguissamilluunniit eqqarsaateqarneq, inuiaqatigiit ineriartortinneqarneranni, ataatsimoornerusumik isiginnilluni pingaartittariaqartunut patsisitalersukkamik akerliusoq, tak. § 3, Nunatta Katersugaasiviata Allagaateqarfiatalu suliaq Naalakkersuisunut aalajangiiffigisassanngorlugu saqqummiutissavaa. Suliaq Naalakkersuisunut saqqummiunneqannginnerani Nunatta Katersugaasiviata Allagaateqarfiatalu Kulturikkut kingornussat pillugit siunnersuisoqatigiinnut oqaaseqaateqarfigitissavaa. Kulturikkut kingornussat pillugit siunnersuisoqatigiinnut saqqummiussinermini, tamatumalu kingorna suliaq Naalakkersuisunut ingerlateqqinnerani, Nunatta Katersugaasiviata Allagaateqarfiatalu ilanngullugit tunniutissavai, eqqissimatitassanngortitsinissamik suliaq aalajangiiviginissaanut inassuteqaatini aamma Naalakkersuisut eqqissimatitsinissamik eqqarsaataagaluaq tunuartillugu imaluunniit eqqissimatitsineroreersoq allanngortillugu atorunnaarsillugulluunniit aalajangiissagaluarpata, qanganitsap eriagisassap isumannaatsumik uppersaasorsorneqarnissanut pisariaqartumik iliuusissatut inassuteqaatini.

*Imm. 2.* Naalakkersuisut eqqissimatitsinissamik imaluunniit eqqissimatitsinermik pioreersumik atuutsitsiinnarnissamik allannguissamilluunniit aalajangiissagaluarunik malittarisassanik § 6, imm. 1-3-miittunik sanioqutitsisinnaapput.

**§ 9.** Nunatta Katersugaasiviata Atuagaateqarfiatalu eqqissimatitsinerit aamma taakkununga allannguinerit atorunnaarsitsinerilluunniit, tamakku pillugit aalajangiisoqarneraniit, ullut 14-it qaangiutsinnagit tamanut saqqummiutissavai. Piginnittoq, atuisut nunaminertamik tunineqarsimasut allatulluunniit atuisinnaatitaasut aamma kommuni qanganitsap eriagisassap inissisimaffigisaa, kiisalu pineqartumut soqutiginnittut allat toqqaannartumik ilisimatinneqassapput.

*Imm. 2.* Sumiiffimmut qanganitsap eriagisassap inissisimaffigisaanut pisinnaatitaanermik pigisaqartunit tamanit, eqqissimatitsineq ataqqineqassaaq, pisinnaatitaanerup qanga atuutilersimanera apeqqaatinnagu.

**§ 10.** Nunatta Katersugaasiviata Allagaateqarfiatalu qanganitsat eriagisassat imaaliallaannarlugit peerneqarsinnaanngitsut eqqissimatitaasut ilisimaneqartut tamaasa nalunaarsussavai, matumani ilanngullugit eqqissimatitassanngortitsinermut piumasaqaataasut.

*Imm. 2.* Nunatta Katersugaasiviata Allagaateqarfiatalu qanganitsat eriagisassat imaaliallaannarlugit peerneqarsinnaanngitsut Inatsisartut inatsisaat manna tunngavigalugu eqqissimatitassanngortitaasimasut nakkutigissavai.

*Imm. 3.* Nunatta Katersugaasiviata Allagaateqarfiatalu aningaasanut inatsimmi aningaasaliissutit iluini qanganitsat eriagisassat imaaliallaannarlugit peerneqarsinnaanngitsut pingaaruteqartut aserfallatsaalineqarnissaat isumagissavaa.

*Tigussaasumik pilersaarusiornermut atatillugu aammalu assaanissamut piareersarnermut  
atasumik qanganitsat eriagisassat imaaliallaannarlugit peerneqarsinnaanngitsut  
isumannaarneqarneri*

**§ 11.** Nunatta Katersugaasiviata Allagaateqarfiatalu nunaminertanik pilersaarusiornermut aatsitassalerinermullu oqartussaasut susassaqtullu allat, nunap pisuussutaanik atuineramik suliaqartut suleqatigalugit sulissutigissavaa qanganitsat eriagisassat imaaliallaannarlugit peerneqarsinnaanngitsut aamma ilisimasat paasissutissallu taakkunannga pilersut siunissaq eqqarsaatigalugu isumannaarneqarnissaat.

*Imm. 2.* Nunaminertanik pilersaarusiornermut aatsitassalerinermullu oqartussat allallu nunap piinik atuineramik suliaqartut, pilersaarusiornerminni akuersissutillu suliarinerini qanganitsanik eriagisassanik imaaliallaannarlugit peerneqarsinnaanngitsunik attuisinnaasut suliaritillugit Nunatta Katersugaasivia Allagaateqarfialu akulerutsittassavaat.

*Imm. 3.* Nunaminertanik pilersaarusiornermut aatsitassalerinermullu oqartussat allallu nunap piinik atuineramik suliaqartut, akuersissutinik qanganitsanik eriagisassanik imaaliallaannarlugit peerneqarsinnaanngitsunik attuisinnaasunik suliaqarnerminnut atatillugu, Inatsisartut inatsisaanni matumani imm. 4-mi, §§ 12-16-imi aamma § 32-mi imarisaasut pillugit qinnuteqartoq nalunaarfigisassavaat.

*Imm. 4.* Annertuumik assaasoqassatillugu sanaartortitsisup Nunatta Katersugaasivia Allagaateqarfialu akulerutsissavaa.

*Imm. 5.* Sumiiffinni pineqartuni imm. 2 aamma 4 naapertorlugit peqataatitsilluni Nunatta Katersugaasiviata Allagaateqarfiatalu allagaateqarfiit atorlugit qanganitsanik eriagisassanik imaaliallaannarlugit peerneqarsinnaanngitsunik peqarneranik nakkutillineq ingerlatissavaa.

**§ 12.** Sanaartortitsisup imaluunniit misissueqqaarnermik assaanernilluunniit akiliisussap, suliap aallartinnginerani Nunatta Katersugaasivia Allagaateqarfialu qinnuigisinnaavaa sumiiffiup pineqartup qanganisarsiornikkut naliliivigineqarnissaanik.

*Imm. 2.* Nunatta Katersugaasiviata Allagaateqarfiatalu aalajangiussinnaavaa sumiiffimmi pineqartumi qanganisarsiornikkut naliliisoqassasoq, sumiiffik qanganisarsiornikkut ilisimaneqanngippat imaluunniit qanganitsanik eriagisassanik imaaliallaannarlugit peerneqarsinnaanngitsunik peqarnissaa ilimagissallugu patsisissaqarpat.

*Imm. 3.* Qanganisarsiornikkut naliliineq piaarnerpaamik pissaaq, immikkullu ittunik pisoqartinnagu qaammatit 9 qaangiutsinnagit naammasseriissalluni. Piffissaliussaq naatsorsorneqassaaq naliliinissamik qinnuteqaateqarnermiit, tak. imm. 1, imaluunniit qanganisarsiornikkut naliliinissap aalajangiunneqarnerata, tak. imm. 2, sanaartortitsisumut imaluunniit assaanermik akiliisussamut nalunaarutigineqarneraniit.

**§ 13.** Sanaartortitsisup imaluunniit misissueqqaarnermik assaanermilluunniit akiliisussap suliap aallartinnginnerani Nunatta Katersugaasivia Allagaateqarfiatalu qinnuigisinnaavaa sumiiffimmi qanganisarsiornikkut misissuineramik ingerlatseqqullugu.

*Imm. 2.* Nunatta Katersugaasiviata Allagaateqarfiatalu aalajangiussinnaavaa sumiiffimmi pineqartumi qanganisarsiornikkut misissuisoqassasoq, Nunatta Katersugaasiviata Allagaateqarfiatalu nalilerpagu sumiiffik qanganitsanik eriagisassanik imaaliallaannarlugit peerneqarsinnaanngitsunik peqartoq.

*Imm. 3.* Qanganisarsiornikkut misissuineq piaarnerpaamik pissaaq, immikkullu ittunik pisoqartinnagu qaammatit 18-it qaangiutsinnagit naammasseriissalluni. Qanganisarsiornikkut misissuineq sioqqullugu qanganisarsiornikkut naliliisoqarsimappat, tak. § 12, immikkut ittunik pisoqartinnagu, qanganisarsiornikkut naliliineq aamma qanganisarsiornikkut misissuineq ataatsimut qaammatit 18-it qaangiutsinnagit naammassereersimassapput. Piffissaliussaq naatsorsorneqassaaq naliliinissamik qinnuteqaateqarnermiit, tak. imm. 1,

imaluunniit qanganisarsiornikkut misissuinissap aalajangiunneqarnerata, tak. imm. 2, sanaartortitsisumut imaluunniit assaanermik akiliisussamut nalunaarutigineqarneraniit.

**§ 14.** Sanaartortitsisup imaluunniit assaanermik akiliisussap, qanganisarsiornikkut naliliinermut imaluunniit qanganisarsiornikkut misissuinermut aningaasartuutit akilissavai. Nunatta Katersugaasivia Atuagaateqarfialu naliliinermut imaluunniit misissuinermut aningaasartuutitsat missingersersuusiussavai. Missingersersuut sanaartortitsisumut imaluunniit assaanermik akiliisussamut akuerisassanngorlugu piaarnerpaamik naliliinerup misissuinerulluunniit aallartinnginerani saqqummiunneqassaaq.

*Imm. 2.* Inuit namminneerlutik annikinnerusumik nunami assaaneranni, aamma aatsitassat ingerlassallu tamatumunnga pingaaruteqartut pillugit Inatsisartut inatsisaat naapertorlugu annikinnerusumik ujaasinissamut atuinissamullu akuerisaasunut, qanganisarsiornermi misissuineranut Naalackersuisut tamakkiisumik ilaannakortumilluunniit aningaasartuutininik matussusiisnaapput, aningaasartuutit nammineerluni sanaartortitsisumut imaluunniit annikinnerusumik ujaasinissamut atuinissamullu akuerisaasumut naleqqutinngitsumik artukkiissappata. Naalackersuisut ilaannakortumik aningaasartuutininik matussusiippata, nammineerluni sanaartortitsisoq imaluunniit annikinnerusumik ujaasinissamut atuinissamullu akuerisaasoq missingersersuummik akuerisassaanik saqqummiiffigineqassaaq, tak. imm. 1.

**§ 15.** Nunami assaanerit, qanganitsamik eriagisassamik imaaliallaannarlugit peerneqarsinnaanngitsunik imaluunniit qanganisarsiornikkut naliliinermik imaluunniit misissuinermik, attuisussaatinnagit aallartinneqarnissaat Nunatta Katersugaasiviata Allagaateqarfialu aalajangiiffigissavaa. Aalajangiinermi pingartinneqassapput qanganitsat eriagisassat imaaliallaannarlugit peerneqarsinnaanngitsut illersorneqarnissaat, qanganisarsiornikkut naliliinerit misissuinerillu ingerlanneqarnissaasa qularnaarnissaat assaanerullu aallartinneqarnissaanut periarfissat.

*Assaanerup nalaani qanganitsat eriagisassat imaaliallaannarlugit peerneqarsinnaanngitsut nassaarineqartut*

**§ 16.** Assaanerup nalaani qanganitsamik eriagisassamik imaaliallaannarlugu peerneqarsinnaanngitsumik naammattuuisoqarpat sanaartortitsisup nassaarneq erngertumik Nunatta Katersugaasivianut Allagaateqarfianullu nalunaarutigissavaa, suliarlu - qanganitsamik eriagisassamik imaaliallaannarlugu peerneqarsinnaanngitsumik attuina naapertorlugu - unitsinneqassaaq. Nunatta Katersugaasiviata Allagaateqarfialu aalajangissavaa qanganisarsiornikkut misissuisoqassanersoq, tak. § 13, imm. 2, imaluunniit eqqissimatitsinissaq siunertaralugu suliamik aallartitsisoqassanersoq, tak. § 5, imm. 2.

**§ 17.** Nunatta Katersugaasivia Allagaateqarfialu qanganitsat eriagisassat imaaliallaannarlugit peerneqarsinnaanngitsut aammalu nassaat assaaviginissaannut suliffeqarfinnut allanut imaluunniit ilisimatusarnikkut soqutigisaqaqatigiinnut akuersissuteqarsinnaavoq, akuersissutinullu atasumik piumasaqaasiorluni.

### **Kapitali 3**

#### *Illut*

**§ 18.** Nunatta Katersugaasiviata Allagaateqarfialu, taamaattoq tak. § 20, tusarniaareernikkut, tak. § 19, imm. 2, illut piuinnaarnissaat illersornissaalluunniit

oqaluttuarisaanikkut imaluunniit illulioriaatsikkut annertuumik pingaaruteqartut eqqissimatinnissaat aalajangissavaa.

*Imm. 2.* Illunik eqqissimatitassanngortitsinerup malitsigissavaa illup aserfallatsaaliorneqarnissaanut aamma sanaartorfigineqarsinnaaneranut naleqqiullugu immikkut pisussaaffeqarneq, tak. § 22.

*Imm. 3.* Naalackersuisut, Nunatta Katersugaasiviata Allagaateqarfiatalu inassuteqareerneratigut, illunik eqqissimatitassanngortitsisarneq pillugu malittarisassiuussisinnaapput, eqqissimatitsinermut piumasaqaataasussat ilanngullugit.

**§ 19.** Piginnittut, atuisut nunaminertamik tunineqarsimasut allatulluunniit nunaminertamik illumilluunniit atuisinnaatitaasut, naalagaaffik, kommunit, sumiiffinni katersugaasiviit aammalu peqatigiiffiit siunertanik nalinginnaasumik aalajangersimanerusumilluunniit eqqissimatitsinissamik ataavartitsinissamillu isumaginnittut eqqissimatitassanngortitsinissaq kiisalu taassuminnga allannguinnissaq imaluunniit atorunnaarsitsinissaq pillugit sulianik aallartitsinnaapput, tamatumunnga ilanngullugit illup eqqissimatitaasup nuuneqarnissaa pillugu suliassat. Taamatuttaaq Nunatta Katersugaasivia Allagaateqarfialu tamanna pillugu nammineq suliamik aallartitsinnaavoq.

*Imm. 2.* Eqqissimatitassanngortitsinissamik kiisalu taassuminnga allannguinnissamik imaluunniit atorunnaarsitsinissamik aalajangiissoqarnissaq sioqqullugu inuit tamat, piginnittoq, atuisut nunaminertamik tunineqarsimasut allatulluunniit nunaminertamik illumilluunniit atuisinnaatitaasut, kommunilu illup inissimaffigisaa, Naalackersuisut allallu pineqartumut soqutigisallit ilisimatinneqassapput tusarniaaffigineqarlutillu. Tusarniaanissamat piffissaliusaaq qaammatinik 3-nik sivissuseqassaaq, pineqartullu piffissap taassuma iluani oqaaseqaateqarnissamat periarfissaqartitaapput. Kiisalu Kulturikkut kingornussat pillugit siunnersuisoqatigiit inassuteqaateqassapput, tak. § 29, imm. 2.

*Imm. 3.* Imm. 2-mi taaneqartup ilisimatitsinerup pineraniit eqqissimatitassanngortitsinissamat akornutaasinnaasumik imaluunniit ajornartorsioritsinnaasumik iliuuseqartoqassanngilaq. Tamannali atuutinngilaq aatsitassarsiornermut tunngasuni misissueqqaarnissamat, ujarlernissamat atuisinnaanermullu akuersissutaareersunut, sikumik imermillu isumalluutinut tunngasunut, kiisalu erngup nukinganik nukissiorfiliornernut taamatullu taakkununnga atasumik misissueqqaarnernut.

*Imm. 4.* Eqqissimatitassanngortitsinissamik kiisalu taassuminnga allannguinnissamik atorunnaarsitsinissamilluunniit suliat Nunatta Katersugaasiviata Allagaateqarfiatalu aalajangiiffigissavai. Nunatta Katersugaasivia Allagaateqarfialu aalajangiinnermut atatillugu piumasaqaatinik aalajangersaasinnaavoq.

**§ 20.** § 19 malillugu tusarniaanermi tunngavissaqartumik paasinarsippat eqqissimatitassanngortitsinissamik eqqarsaateqarneq imaluunniit eqqissimatitsinermik pioreersumik atuutsitsiinnarnissamik allannguinnissamilluunniit eqqarsaateqarneq, inuiaqatigiit ineriartortinneqarneranni, ataatsimoornerusumik isiginnilluni pingaartittariaqartunut akerliusoq, Nunatta Katersugaasiviata Allagaateqarfiatalu suliaq Naalackersuisunut aalajangiiffigisassanngorlugu saqqummiutissavaa. Naalackersuisut aalajangiinnginneranni suliaq Kulturikkut kingornussat pillugit siunnersuisoqatigiinnut oqaaseqarfigeqqullugu saqqummiunneqassaaq. Kulturikkut kingornussat pillugit siunnersuisoqatigiinnut saqqummiussinermini, tamatumalu kingorna suliap Naalackersuisunut ingerlateqqinnerani, Nunatta Katersugaasivia Allagaateqarfialu, eqqissimatitassanngortitsinissap aalajangiiffiginissaanut aamma Naalackersuisut eqqissimatitsinariatik imaluunniit eqqissimatitsinermik pioreersumik allannguinnissamik atorunnaarsitsinissamilluunniit aalajangiissagaluarpata, illup illersorneqarsinnaasumik uppersaasorsorneqarnissaa qularnaarumallugu iliuuserisassat pisariaqartut pillugit inassuteqaateqassaaq.

*Imm. 2.* Naalackersuisut eqqissimatitsinissamik imaluunniit eqqissimatitsinermik pioreersumik atuutsitsiinnarnissamik allannguinnissamilluunniit aalajangiissagaluarunik, Naalackersuisut malittarisassanik § 22, imm. 1-imiittunik sanioqqutitsisinnaapput.

**§ 21.** Nunatta Katersugaasiviata Allagaateqarfiatalu eqqissimatitassanngortitsinermik, aamma takkuninnga allannguinerimik imaluunniit atorunnaarsitsinermik aalajangiinerit, aalajangiinerimiit ullut 14-it qaangiutsinnagit, tamanut nalunaarutigissavai. Piginnittoq, atuisut nunaminertamik tunineqarsimasut, allatulluunniit illumik atuisinnaatitaasut kommunilu illup inissisimaffigisaa, kiisalu susassaqtut allat tamarmik toqqaannartumik ilisimatinneqassapput.

*Imm. 2.* Eqqissimatitassanngortitsinernik aalajangiinerit Nunatta Katersugaasiviata Allagaateqarfiatalu piumasaqaateqarneratigut Kalaallit Nunaanni Eqqartuussivimmit nalunaarsorneqassapput. Piginnittut ninneri Kalaallit Nunaanni Eqqartuussiviup Nunatta Katersugaasivianut Allagaateqarfianullu nalunaarutigissavai.

*Imm. 3.* Eqqissimatitsineq illumut pisinnaatitaaffimmik pigisaqtut tamarmik ataqqissavaat, pisinnaatitaaffik qaqugukkut pilersimanersoq apeqquaatinnagu.

**§ 22.** Illu eqqissimatitaq piginnittunit isumannaatsumik aserfallatsaaliineqassaaq eqqissimatitassanngortitsinermut naapertuuttumik. Nalinginnaasumik aserfallatsaaliuineq pissaaq atortussat, periutsit qalipaattillu maannamut atorneqartut atorlugit, illullu eqqissimatitassanngortitaasimasup eqqissimatitassanngortitsinerup nalaani qanoq issusia isikkualu naapertorlugit. Nunatta Katersugaasiviata Allagaateqarfiatalu immikkut pissutsit taamaaliornissaq taperserpassuk, atortussat, periutsit qalipaattillu maannamut atorneqartut atornisaannik piumasaqaat sanioqqussinnaavaa.

*Imm. 2.* Illumi eqqissimatitassanngortitami sanaartornerit tamarmik Nunatta Katersugaasivianit Allagaateqarfiannillu akuerineqaqqaassaapput, suliaq illup ilaanut eqqissimatitassanngortitsinermi pineqartunut ilaappat, aammalu suliaq nalinginnaasumik aserfallatsaaliinermit annertuneruppat. Nunatta Katersugaasivia Allagaateqarfialu akuersissummut atasumik piumasaqaateqarsinnaavoq.

*Imm. 3.* Qinnuteqartoqareerneratigut Nunatta Katersugaasivia Allagaateqarfialu aalajanger-sinnaavoq illumi eqqissimatitassanngortitami aserfallatsaaliuinerimut imaluunniit sanaartornerimut aningaasartuutit aningaasanut inatsimmi aningaasaliissutit iluannit tamakkiisumik ilaannakortumilluunniit aningaasartuutigineqassasut.

**§ 23.** Illut eqqissimatititaasut Nunatta Katersugaasiviata Allagaateqarfiatalu nalunaarsussavai, eqqissimatitassanngortitsinermi piumasaqaataasut ilanngullugit.

*Imm. 2.* Nunatta Katersugaasiviata Allagaateqarfiatalu illut eqqissimatitit nakkutigissavai.

## **Kapitali 4**

### *Sumiiffiit kulturikkut oqaluttuarisaanermi pingaarutillit*

**§ 24.** Nunatta Katersugaasiviata Allagaateqarfiatalu, taamaattorli tak. § 26, tusarniaaneq ingerlatereerlugu, tak. § 25, imm. 2, sumiiffiit kulturikkut oqaluttuarisaanermi pingaarutillit eqqissimatitassanngortinneqarnissaannik allatulluunniit kulturikkut kingornussatut illersorneqarnissaannik aalajangiissaaq, sumiiffiit piunnarnissaat imaluunniit illersorneqarnissaat annertuumik pingaaruteqarpat.

*Imm. 2.* Sumiiffiit kulturikkut oqaluttuarisaanermi pingaarutillit eqqissimatitassanngortinneqarnerannut allatulluunniit kulturikkut kingornussatut



illersugassanngortinneqarnerannut ilaavoq ataqatigiissuseq, kulturikkut eriagisassat arlaqartut imaluunniit sumiiffiup immikkut pisimasoqarfiusup akornanni piusoq.

*Imm. 3.* Sumiiffiit kulturikkut oqaluttuarisaanermi pingaarutillit eqqissimatitassanngortinneqarnerisa nassatarissavaa sumiiffiup iluani sunilluunniit iliuseqarnissap inerteqqutaanera, kikkunnilluunniit tikinneqarsinnaanissaat eqqaassanngikkaanni. Immikkut tunngavissaqavitsillugu Nunatta Katersugaasivia Allagaateqarfialu tamatuminnga sanioqqutitsinissamik akuersisinnaavoq.

*Imm. 4.* Sumiiffinnik kulturikkut oqaluttuarisaanermi pingaarutilinnik allatut kulturikkut kingornussatut illersugassanngortitsinerup nassatarissavaa, sumiiffiup iluani sunilluunniit sumiiffiup ilaanut imaluunniit sumiiffimmut tamarmut isikkuluutaalersinnaasumik aseruutaasinnaasumilluunniit iliuseqartoqassanngimmat. Immikkut tunngavissaqavitsillugu Nunatta Katersugaasivia Allagaateqarfialu tamatuminnga sanioqqutitsinissamik akuersisinnaavoq.

*Imm. 5.* Naalackersuisut Nunatta Katersugaasiviata Allagaateqarfialu inassuteqareerneratigut sumiiffiit kulturikkut oqaluttuarisaanermi pingaarutillit eqqissimatitassanngortinneqarnissaannut allatulluunniit kulturikkut kingornussatut illersorneqarnissaannut malittarisassaliorsinnaapput, tamatumunnga ilanngullugit sumiiffiup killilerlugu nalunaarsorneqarnera, sumiiffiup atorneqarsinnaanera, sumiiffiup aqunneqarnera kiisalu sumiiffimmut ornigussinnaaneq ornigunermilu akiliuteqarsinnaaneq.

**§ 25.** Piginnittut, atuisut nunaminertamik tunineqarsimasut imaluunniit nunaminertamik allatut atuinissamik akuerisaasut, naalagaaffik, kommunit, sumiiffinni katersugaasiviit aammalu peqatigiiffiit nalinginnaasumik aalajangersimasumilluunniit eqqissimatitsinissaq ataavartitsinissarlunniit siunertarlugu isumagisaqartut, eqqissimatitassanngortitsinissaq allatulluunniit kulturikkut kingornussatut illersuinissaq pillugit suliamik, kiisalu taassuminnga allannguinissaq imaluunniit atorunnaarsitsinissaq pillugu suliamik aallartitsisinnaapput. Taamatuttaaq Nunatta Katersugaasivia Allagaateqarfialu tamanna pillugu nammineq suliamik aallartitsisinnaavoq.

*Imm. 2.* Eqqissimatitassanngortitsinissamik allatulluunniit kulturikkut kingornussatut illersugassanngortitsinissamik, kiisalu taakkuninnga allannguinissamik imaluunniit atorunnaarsitsinissamik aalajangiisoqarnissaa sioqqullugu inuit tamat, piginnittoq, atuisut nunaminertamik tun ineqarsimasut allatulluunniit nunaminertamik atuinissamut akuerineqarsimasut, kommunilu sumiiffiup kulturikkut oqaluttuarisaanermi pingaarutillip inissisimaffigisaa, Naalackersuisut allallu pineqartumut soqutigisallit ilisimatinneqassapput tusarniaavigineqarlutillu. Tusarniaanissamut piffissaliusaaq qaammatinik 3-nik sivisusseqassaaq, pineqartullu piffissap taassuma iluani oqaaaseqaateqarnissaminnut periarfissaqartitaallutik. Aammattaaq Kulturikkut kingornussanut siunnersuisoqatigiit inassuteqaateqarsinnaapput, tak. § 29, imm. 2.

*Imm. 3.* Imm. 2-mi taaneqartup nalunaaruteqarnerup pineraniit eqqissimatitassanngortitsinissamik allatulluunniit kulturikkut kingornussatut illersugassanngortitsinissamik pilersaaruteqarnermut akornutaasinnaasumik imaluunniit ajornartorsiortitsinissaasumik iliuseqartoqassanngilaq. Tamannali atuutinngilaq aatsitassasiormut tunngasuni misissueqqaarnissamut, ujarlernissamut atuisinnaanermullu akuersissutaareersunut, sikumik imermillu isumalluutinut tunngasunut, kiisalu erngup nukinganik nukissiorfiliornernut taamatullu taakkununnga atasumik misissueqqaarnernut.

*Imm. 4.* Eqqissimatitassanngortitsinissamik allatulluunniit kulturikkut kingornussatut illersugassanngortitsinissamik taakkuninngalu allannguinissamik atorunnaarsitsinissamilluunniit suliassat Nunatta Katersugaasiviata Allagaateqarfialu aalajangiiffigisassavai.

**§ 26.** § 25, imm. 2 malillugu tusarniaanermi patsisitalersukkamik paasinarsippat, eqqissimatitassanngortitsinissamik allatulluunniit kulturikkut kingornussatut illersugassanngortitsinissamik imaluunniit eqqissimatitsinerup allatulluunniit kulturikkut kingornussatut illersuinerup pioreersup atuutsiinnarneqarnissaanik allanngortinneqarnissaanilluunniit eqqarsaateqarneq inuiaqatigiit ineriartortinneqarneranni, ataatsimoornerusumik isiginnilluni pingaartittariaqartunut, tak. § 3, akerliusoq, Nunatta Katersugaasiviata Allagaateqarfiatalu suliaq Naalakkersuisunut aalajangiiffigisassanngorlugu saqqummiutissavaa. Naalakkersuisut aalajangiinnginneranni suliaq Kulturikkut kingornussat pillugit siunnersuisoqatigiinnut oqaaseqarfigeqqullugu saqqummiunneqassaaq. Kulturikkut kingornussat pillugit siunnersuisoqatigiinnut saqqummiussinermini, tamatumalu kingorna suliap Naalakkersuisunut ingerlateqqinnerani Nunatta Katersugaasivia Allagaateqarfialu, eqqissimatitassanngortitsinissap allatulluunniit kulturikkut kingornussatut illersuinissap aalajangiiffiginissaanut aamma Naalakkersuisut eqqissimatitsiniaratik imaluunniit allatut kulturikkut kingornussatut illersugassanngortitsiniaratik, imaluunniit eqqissimatitsinermik allatulluunniit kulturikkut kingornussatut illersuinermik pioreersumik allannguinnissamik atorunnaarsitsinissamilluunniit aalajangiissagaluarpata, sumiiffiup kulturikkut oqaluttuarisaanermi pingaaruteqartup illersorneqarsinnaasumik uppersaasorsorneqarnissaa qularnaarumallugu iliuuserisassat pisariaqartut pillugit inassuteqaateqassaaq.

*Imm. 2.* Naalakkersuisut eqqissimatitsinissamik allatulluunniit kulturikkut kingornussatut illersuinissamik imaluunniit eqqissimatitsinermik pioreersumik atuutsiinnarnissamik allannguinnissamilluunniit aalajangiissagaluarunik, Naalakkersuisut malittarisassanik § 24, imm. 3-4-miittunik sanioqqutitsinnaapput.

**§ 27.** Nunatta Katersugaasiviata Allagaateqarfiatalu eqqissimatitassanngortitsinermik allatulluunniit kulturikkut kingornussatut illersugassanngortitsinermik, aamma taakkuninnga allannguinermik imaluunniit atorunnaarsitsinermik aalajangiinerit, aalajangiinnermiit ullut 14-it qaangiutsinnagit, tamanut nalunaarutigissavai. Piginnittoq, atuisut nunaminertamik tunineqarsimasut, allatulluunniit nunaminertamik atuisinnaatitaasut kommunilu sumiiffiup kulturikkut oqaluttuarisaanermi pingaaruteqartup inissisimaffigisaa, kiisalu susassaqtut allat tamarmik toqqaannartumik ilisimatinneqassapput.

*Imm. 2.* Eqqissimatitsineq allatulluunniit kulturikkut kingornussatut illersugassanngortitsineq pisinnaatitaaffimmik pigisaqartunit tamanit ataqqineqassapput, pisinnaatitaaffik qaqugukkut pilersimanersoq apeqqaatinnagu.

**§ 28.** Nunatta Katersugaasiviata Allagaateqarfiatalu sumiiffiit kulturikkut oqaluttuarisaanermi pingaaruteqartut eqqissimatitaasut allatulluunniit kulturikkut kingornussatut illersugaasut tamaasa nalunaarsussavai, matumani ilanngullugit eqqissimatitassanngortitsinermi allatulluunniit kulturikkut kingornussatut illersugassanngortitsinermi piumasaqaataasut.

*Imm. 2.* Nunatta Katersugaasiviata Allagaateqarfiatalu sumiiffiit kulturikkut oqaluttuarisaanermi pingaaruteqartut eqqissimatitallat allatulluunniit kulturikkut kingornussatut illersugaasut nakkutigissavai.

*Imm. 3.* Nunatta Katersugaasiviata Allagaateqarfiatalu aningaasanut inatsimmi aningaasaliissutit iluanni sumiiffiit kulturikkut oqaluttuarisaanermi pingaarutillit eqqissimatitassanngortinneqarsimasut allatulluunniit kulturikkut kingornussatut illersugassanngortinneqarsimasut aserfallatsaalineqarnissaat isumagissavaa.

## **Kapitali 5**

### *Kulturikkut kingornussat pillugit siunnersuisoqatigiit*

**§ 29.** Naalackersuisut Kultureqarnermut ilaasortaata Kulturikkut kingornussat pillugit siunnersuisoqatigiit 3-nik ilaasortallit pilersissavai, illussanik ilusilersuineranut, qanganisarsiornermut kulturikkullu oqaluttuarisaanermut ilisimasaqartunit inuttaqartussat. Kulturikkut kingornussat pillugit siunnersuisoqatigiit ukiut sisamakkaarlugit toqqarneqartassapput.

*Imm. 2.* Kulturikkut kingornussat pillugit siunnersuisoqatigiit eqqissisimatitassanngortitsinissamik allatullu kulturikkut kingornussatut illersorneqartussanngortitsinissamik suliat pillugit inassuteqaateqartassapput, § 22, imm. 2-lu malillugu akuersissutinut atatillugu tusarniarneqartassalluk. Taakku saniatigut illunik eqqissisimatitassanngortitsiniarnermi sumiiffinnillu kulturikkut oqaluttuarisaanermi pingaaruteqartunik eqqissisimatitassanngortitsiniarnermi allatulluunniit kulturikkut kingornussatut illersugassanngortitsiniarnermi pineqartunullu attuumassuteqartuni siunnersuisutut inissisimassallutik.

*Imm. 3.* Kulturikkut kingornussat pillugit siunnersuisoqatigiinnut Nunatta Katersugaasivia Allagaateqarfialu allatseqartitsissaaq.

## **Kapitali 6**

### *Pinngitsaaliissummik pigisanik piginnikkunnaarsitsisarneq naammagittaalliorsinnaanerlu*

**§ 30.** Naalackersuisut Inatsisartut inatsisaat manna malillugu eqqissisimatitassanngortitsinissap allatulluunniit kulturikkut kingornussatut illersugassanngortitsinissap naammassinissaanut pisariaqarpat, pigisanik pineqartumik pinngitsaaliissummik piginnikkunnaarsitsinissamut pisinnaatinneqarput. Pinngitsaaliissummik piginnikkunnaarsitsinissaq pissaaq piginnikkunnaarsitsisarneq pillugu malittarisassat qaqugukkulluunniit atuuttut malillugit.

**§ 31.** Nunatta Katersugaasiviata Allagaateqarfialu Inatsisartut inatsisaat manna naapertorlugu aalajangiineri Naalackersuisunut allakkatigut naammagittaalliutigineqarsinnaapput.

*Imm. 2.* Naammagittaalliorsinnaatitaapput:

- 1) Kinaluunniit aalajangiineri pineqartoq.
- 2) Kinaluunniit suliap qanoq inerneqarnissaanik inuttut imaluunniit annertuumik soqutigisaqartutut naatsorsuutigineqartariaqartoq.

*Imm. 3.* Naammagittaalliornissamut piffissarititaapput sapaatip-akunneri 4, ullormit aalajangiinerup aalajangiineri pineqartumut nalunaarutigineqarfianiit. Piffissaliussap qaangiutinnginnerani naammagittaalliorneq, aalajangiinermik pineqartumik kinguartitsinermik kinguneqassaaq, naammagittaalliorfissatut oqartussaasoq allatut aalajangiinnigippat.

*Imm. 4.* Naalackersuisut piffissaliussamut killigititap qaangerneqarsimanera atuutinngitsoortissinnaavaat, pissutsit immikkut ittut taama iliornissaq pisariaqartilissappassuk.

*Imm. 5.* Naalackersuisut aalajangiineri allaffissornikkut sulialinnut allanut ingerlateqqinneqarsinnaanngillat.

## **Kapitali 7**

### *Pineqaatissiissutit*

§ 32. Akiliisussanngortitsisoqarsinnaavoq § 6, imm. 1-3, § 9, imm. 2, § 11, imm. 2-4, § 16, naggat siulleq, § 19, imm. 3, § 21, imm. 3, § 22, imm. 1 aamma 2, § 24, imm. 3 aamma 4, § 25, imm. 3, § 27, imm. 2 unioqqutinneqarpata aamma malittarisassat piunasaqaatillu § 3, imm. 3, § 5, imm. 3, § 18, imm. 3, § 19, imm. 4 aamma § 24, imm. 5 naapertorlugit aalajangersakkat unioqqutinneqarpata.

*Imm. 2.* Inatsisartut inatsisaat imaluunniit peqqussutit Inatsisartut inatsisaat tunngavigalugu atuuttuulersinneqartut akiliisitsinissamik pisinnaatitsippata, akiliisitsinikkut akiligassaq inummut inatsisitigut akisussaasumut Kalaallit Nunaanni pinerluttaalisitsinermi inatsit naapertorlugu akiligassanngortinneqarsinnaavoq.

*Imm. 3.* Unioqqutitsinikkut iluanaarutit arsaarinnissutigineqanngippata, akiligassiisutit annertussuilerneqarnerani iluanaarutaasimasut annertussusaat immikkut naatsorsuutigineqassapput.

*Imm. 4.* Akiliisussanngortitsineq aamma arsaarinninneq Nunatta karsianut iluaqutaasussanngorlugit pissapput.

## **Kapitali 8**

### *Atortuulersitsineq, atorunnaarsitsinermi ikaarsaariarnermilu aalajangersakkat*

§ 33. Inatsisartut inatsisaat atuutilissaaq ulloq 1. juli 2010. Ilutigisaanik Kulturikkut eriagisassat eqqissisimatitaanerat pillugu Inatsisartut inatsisaat nr. 18, 19. november 2007-imeersaq atuukkunnaassaaq.

§ 34. Eqqissisimatitassanngortitsinerit, eqqissisimatitassanngortitsinernik allatigulluunniit kulturikkut kingornussatut illersugassanngortitsinermik Inatsisartut inatsisaat manna malillugu taarserneqanngitsut atuutiinnassapput, atorunnaarsinneqarnissamik tungaanut. Illunik ukiut 100-t sinnerlugit pisoqaassusilinnik atunngitsunillu, § 5, imm. 2 naapertorlugu, Kulturikkut eriagisassat eqqissisimatitaanerat pillugu Inatsisartut inatsisaanni nr. 18, 19. november 2007-imeersumi § 3-mut sanilliullugu, eqqissisimatitsinerit Inatsisartut inatsisaata matuma atuutilerteratigut atorunnaarsinneqassapput.

*Namminersorlutik Oqartussat, ulloq xx i xx. 2010*

Kuupik Kleist

/

Mimi Karlsen